

元秘史李注補正

元祕史李注補正卷六

秀水高寶銓

塔塔兒種人也客扯連

嫌與蒙古忽闌之子也客扯連相混特加塔塔兒種人五字以區別之也

議事後進一鍾酒方許別勒古台荅阿里台入來

案別勒古台以泄漏密議斥荅阿里台則以違犯軍令搶物亦斥之

巴兒忽真脫窟木地面

巴兒忽真脫窟木地面今俄羅斯巴爾古精河入白哈兒湖處南岸之托勒斯托梅托甫斯喀雅也其地北枕巴爾古精

水西臨白哈兒湖托甫斯喀雅邑居之謂托勒斯托梅脫窟
木對音矣後文云脫黑脫阿二子忽圖赤刺温欲與他父相
合順著薛涼格河去則脫黑脫阿此次所走仍是色楞格河
下游固甚明也

古出古敦不亦魯黑

前後文但作不亦魯黑元史本紀作不魯欲罕親征記作盃
祿可汗亦皆不亦魯黑對音然則不亦魯者其罕號古出古
敦則其名也案乃蠻亦難察死塔陽罕嗣而古出古敦亦以
罕稱殆猶匈奴之有南北單于烏孫之有大小昆莫突厥之
頡利突利並汗馱雞兒年札木合以十一部來侵不亦魯黑
與焉故征之

兀魯黑塔黑

兀魯黑塔黑今阿爾泰山尾東南幹之哈拉阿集爾罕山也
在喀爾喀札薩克圖汗部中翼右末旗界國史阿喇布坦傳
曰康熙三十六年噶爾丹自哈薩克圖哈喇阿濟爾罕欲踰
阿勒坦至額克阿喇勒捕魚以食是也哈喇阿集爾罕卽兀
魯黑塔黑之對音矣原注額魯特乃部名不得以爲地名且
係元臣阿魯台後在元太祖時並無此部也

潰豁黑水

潰豁黑水今哈拉阿集爾罕山南麓之綽和爾泊也西北至
烏龍布河六七百里哈拉阿集爾罕山爲阿爾泰山尾東行
支幹綽和爾泊在山南麓烏龍布河在阿爾泰山尾西麓不

魯欲黑東南自綽和爾泊西北向烏龍布河正踰阿爾泰山尾故祕史曰起過阿勒坦山去康熙時噶爾丹欲自哈喇阿濟爾罕踰阿勒坦至額克阿喇勒亦卽此路綽和爾卽潰豁黑對音矣蓋不魯欲黑不能對陣而去自是由東南退走西北潰豁黑水必在烏龍布河東南原注索果克河乃在烏龍布河北非矣

阿勒台山

阿勒台山今日阿爾泰山皆卽阿勒坦異文蒙古語謂金也一統志曰阿爾泰山卽古金山在特思河北綵亘二千餘里爲西北諸山之祖其頂在烏普薩池西北支峯葛整分爲四枝其東北一枝繞特思河北千里東爲唐努山又東北接統

愛山之陰北抵色楞格河其河東一枝

謂額爾齊斯河東也

爲烏藍郭

馬山繞奇勒稽思泊之北又東南爲白勒奇那克科山又東爲昂奇山空格依河出其南麓烏海河出其東北麓又北爲馬鳴刺山布勒噶蘇台河出其東麓又東北爲大山喀喇河諸水出其南麓其南一枝蜿蜒不斷納鄰河呼勒泰河哈流圖河納斯克河布勒濟河哈巴河奇蘭河喀喇額勒奇思河呵額勒奇思河俱出其西麓哈奇勒薩河呵普都河出其東麓山勢旋折而東布顏圖河出其北麓布拉青吉兒河札克台河出其南麓又東爲阿爾泰山之尾又東復分二枝如黑雲二道界瀚海中其東爲庫克西勒山又東北接巴顏山其南枝爲都特嶺布帶山圖古里克河出其西麓又南爲布勒

堪山空鄂洛阿濟罕山層峯不斷千餘里橫截沙漠爲阿爾班岳達察嶺又東南爲古爾板賽漢山其南爲諾默渾山其東南爲五百根山至空可喀喇龍山而止自空鄂洛阿濟罕山南而爲奇齊格納山拜轟郭爾山查喇圖山至伊塔特圖山而止其正北一枝隨額爾齊斯河以北入俄羅斯境不知其遠近何秋濤曰阿爾泰山北幹其西北一枝曰汗阿林隨額爾齊斯河東岸以化者也山脈向西北折西南行抵俄羅斯托博爾城而止其正北一枝自唐努山而北山脈向東北行曰麻科佛斯科嶺北行至大窩集分東北西北二支東北支行至烏格里達海灣之西北濱海而止是爲額爾齊斯河水道提綱曰阿爾泰山卽古西金山其頂在烏普薩池之北轟呵圖池之東北南行至呵額爾濟思河源折而東稍北又東數百里爲阿爾泰山之尾與頂並高銓案不亦

魯黑在兀魯黑塔黑潰豁水起過阿勒台山去至兀灑古河
爲阿額爾濟思河源東之阿爾泰山尾也

巴亦荅刺黑別勒赤兒地面

後文卷七述此事作拜荅刺黑別勒赤列地面親征錄作拜
荅刺邊只兒之野卽今喀爾喀中路右翼末旗境拜塔里克
河東岸庫冷博拉齊爾之地也水道提綱曰貝德勒克河源
出枯庫嶺南麓其北麓隔山卽塔米爾河源也三水南流合
而西南百餘里有查克河自北山合五水南流三百餘里來
會經庫冷白兒齊爾之地又南二百里有察罕鐵木兒河東
北自索呵都衣嶺合二水西南流二百數十里來會又南出
兩山間西南流平地中百數十里有西你河自南合東南一

水北流來會又西南百餘里瀦爲察罕鄂模貝德勒克河一
曰拜塔里克河卽此巴亦荅刺黑對音白兒齊爾一曰博拉
齊爾卽此別勒赤兒對音地在推河之西北巴顏山之東南
正成吉思王罕歸路也

合刺泄兀勒河

合刺泄兀勒河卽今喀喇西喇二河合而西南會布勒噶蘇
台河爲查巴哈河者也水道提綱曰查巴哈河

今輿圖作
札布噶河源

有二最東者曰喀刺河出庫冷白爾齊爾西北大山凡四水
南流并爲二支又西南百餘里合焉又西南受北來一水又
南受東來之西喇河

銓案今輿圖又作錫拉河源出哈拉河
源東南數十里二水南流而合折而西

南百餘里與
哈拉河合

又西受北來一水又西南二百餘里而布勒噶

蘇台河自北來會卽西源也二源既合西南流經巴顏山北麓曰查巴哈河銓案此水經巴顏山北麓正在庫冷博拉齊爾之北蓋王罕本與成吉思截漠東還至是旣爲可克薛兀撒卜刺黑所阻又納札木合之讒遂潛自改道溯札布噶河東源循巴顏山北麓而東哈拉錫拉兩河發源處其東隔山卽塔米爾河源可順流而下也合刺卽哈拉對音泄兀勒卽西喇對音矣原注喀喇淖爾在布拉干河西王罕軍還必不徑此且淖爾水自西北而東南流就使道出於此但當絕河而東何爲溯河而北乎

告天雀兒

告天雀卽雅也似雀稍大如烏白項爾雅燕白脰烏疏脰項

也白項而羣飛者謂之燕鳥是也江東九十月後有之故稱
寒雅遇風則羣噪戾天百千成隊謂之雅陣温庭筠詩寒雅
寥落葉紅時又曰雅背夕陽多元稹詩雅兒噪荻叢唐彥謙
詩暮雅零亂報秋寒陸遊詩亂雅陣起霜天晚又曰寒雅盤
陣起秦觀詞斜陽外寒雅數點皆是物也春暖則絕不復見
蓋亦寒則南飛暖則北向者范昭達從西紀畧曰自歸化城
抵大青山有風自東南來羣雅隨之其體較中華者倍焉聲
甚怪聒聒不已益歸化城以北無百鳥惟有此雅方潛頤夢
園叢說曰叫天子栖海濱叢草之中遇天中晴朗飛鳴直上
雲霄連縣不已翻身而下終朝若是

鎮江志言告天力乏則
投地銓素非力乏乃下

覓食耳江東九十月後種稻既登豆麥始
插或值旱乾茁芽不速輒爲雅所啄取

銓案是鳥好高飛

作噪其聲聒聒故曰告天亦曰噪天曰叫天矣原注因本紀
易告天雀爲鴻雁云云遂謂告天雀蓋蒙古稱鴻雁語非也
額垓兒阿勒台的谷子

案水道提綱曰阿爾泰山南行至阿額勒濟思河源東折而

東數百里爲阿爾泰山之尾一幹南行四百里爲台顏山南

臨大漠西南對阿一幹東南行三百里爲台西爾山四十九度六分

極四十度又東南百餘里分爲二大幹一南百數十里爲都忒

嶺爲布帶山其西卽圖古里克河其東北卽白格爾察罕鄂模及搜濟布拉克地又東爲庫勒奇勒河又

東南百數十里爲布勒堪山南瀕沙漠而東爲空鄂洛阿濟

爾罕山其東北卽西拉布里都池及通奇忒兀爾鄂模又東南分一枝南行大漠中

爲奇齊格納山又東南爲拜轟鄂爾山爲查喇圖山爲伊塔

特圖山而止

南隔沙百餘里即沙中大橫山也

一東數十里南瀕漠而東二

百里徑喀圖搜濟地東南折而北爲達蘭土魯阿達克必柳

圖山

山甚高大其西北隔沙即克里圖博洛山其西隔沙即通奇忒兀爾池其東北隔沙即貝德勒克河下流之察

池又東南縣巨喀爾喀西部略于沙漠中橫經推河之南境

曰也克敖拉地

自此而東南於山北麓沙中爲驛站路

曰巴噶敖拉

其北即阿爾博爾濟

驛西拉布

又東南曰阿勒察圖

其北即塔奇驛又北即塔楚河也

又東南至

阿爾班阿岳爾達察嶺

西十三度極四十四度四分其北爲達察驛北踰大漠爲瓊金河鄂勒昆

河南踰大漠過大橫山又踰

大漠大蹟爲甘肅邊外地又東南五百餘里爲古爾板賽

漢山

山甚高大西十一度極四十三度八分其北郭多理驛

又東南百里分爲二枝一

南曲曲百數十里爲諾默渾山又南百里爲庫默雷山前臨

大磧而止

其南百里即包公哈兒古西活兒活圖山

一東南百八十里爲五百根

山又東南百里爲空可喀喇龍山而止

西九度八分至十度極四十三度二分其

北正當寶金河之尾其南正當河套西北之那林朔龍山也此一技自阿爾泰山尾至此徑踰十度有奇與南大橫山俱橫亘大漠中連綿不斷疑此阿爾泰山之東南一幹也其東卽古浚稽山涿邪山之類

一幹自台西爾山東南百九十里爲庫克西勒克山連亘而

東西十八度八分極四十六度山亦高大其南爲白格爾察罕池其北諸水俱會于空格衣河

百里分一

小幹東南行折而南而西爲克里圖博洛山而長幹北行折

東北其東卽普喀郭必也

四百餘里爲巴顏山甚高大

其西北水皆入空格衣河其東

南水皆入貝德勒克河

爲喀爾喀西部庫冷白爾齊爾地之西境又東

北曲曲三百里當喀喇諸河源之東而阿爾泰山頂東南一幹

曰昂奇山曰馬喇噶山支峯自西北來相接又東行當查克

河諸源之北而阿爾泰山頂東大幹杭愛山南行支阜又自北

來相接自此又南百數十里爲枯庫嶺

東北爲塔米爾北源
西南爲貝德勒克源

又東二百餘里折而南百里又東百餘里爲杭愛山尾包鄂勒昆河諸源而東又東至大漠而止銓案据此阿爾班阿岳爾達察嶺正在拜塔里克河之東南也

撒阿里客額兒地

撒阿里地當克魯倫河曲西南蓋蒙古西界太祖旋師駐此以防乃蠻侵軼

帖列格禿口子

帖列格禿口子卽卷四之迭列禿口子在桑昆所居策策山之東南二百里

察兀兒別乞

案別乞當作別吉元公主表有火臣別吉阿刺海別吉語解
改作必濟云婦人也攷甯古塔紀畧曰子曰濟女曰义而漢
濟然則別吉蓋譯言女子

桑昆子禿撒哈

元史本紀以爲王罕子

俺的女子到他家呵專一門後向北立地他的女子到俺家呵
正面向南坐

是時王罕強盛太祖微弱故桑昆云然門後向北立地謂役
屬於人正面向南坐謂尊爲人主也

豬兒年

癸亥歲

者者額兒温都兒山

後文七卷作者折額兒温都兒山元史本紀作折運都山親
征記作徹徹兒運都山阮惟和曰卽今哈納哈達山東北之
徹徹山也案岷峩山人譯語曰元還沙漠再傳脫古思帖木
兒爲也速迭兒所弑洪武中大兵往討追至徹徹兒山又曰
徹徹兒山洪武中總兵官周興征胡白兀者河兀者河當追
卽翁金河
至此山下皆卽此水道提綱曰翁金河東南流於大漠中瀦
爲呼拉哈五郎鄂模池水東北五十里有哈納哈達山又東
北有徹徹山今輿圖或作策策山北直土拉河四百里許

別兒客額列地面

施元杰曰別兒客額列親征錄作別里法沙陀策策山之北

巴哈噶札爾山之東麓也巴哈噶札爾正與別兒客額列對音銓案客額列卽客額兒譯言曠野親征錄所云沙陀也是其名但曰別兒耳地在者者額兒山陰謂卽巴哈噶札爾山東麓是矣謂卽巴哈噶札爾對音疑非也客列部卓帳土拉瀕漠爲守策策山西據翁金東連商凱轟郭諸山實土拉南面要地元史朮赤台傳曰怯列王可汗之子鮮昆有智勇諸部畏之故駐牧於是所以西拒乃蠻東防蒙古也

額不格真合兒塔阿惕

案合兒塔阿卽荅力台對音額不格真卽額不干對音亦作也不干譯言老人荅力台係太祖叔父故有老人之目矣

合赤溫別乞

案合赤溫疑卽阿赤黑失倫對音

撤亦罕脫迭額

案脫迭額似卽脫朵延對音蓋泰赤兀亡後歸於王罕也

阿勒壇弟也客扯連

案也客扯連蓋依附阿勒壇者阿勒壇叛歸王罕則從之耳

巴歹

案巴歹元史歲賜篇又作八答子

帳房後

案後文卷十一云夜裏若有急事來說先見宿衛一同來帳

房後說者

元祕史李注補正卷七

秀水高寶銓

附近可倚附的伴當

元史哈刺合孫傳曰太祖與二十餘人一夕遁去札八兒傳曰從行僅十九人札八兒與焉

卯溫都兒山

卯溫都兒山親征錄作莫運都兒山元史本紀作阿闐塞今內蒙古烏珠穆秦右翼旗界之賽因溫都兒山也案卯與莫皆卽瑪爾對音唐古特語紅也阿闐卽烏闐對音蒙古語紅也今賽因溫都兒山其西麓曰烏闐哈爾哈科布爾故祕史及親征錄用唐古特語則音轉爲卯爲莫元史用蒙古語又

音轉爲阿闐也施元杰以爲今阿嚙科爾沁旗西北之錫喇
溫都爾山錫喇譯言黃與曰卯曰莫曰阿闐皆不對音而與
下文合刺合勒只惕及忽刺安不刺合惕皆不相應非也

合刺合勒只惕額列惕地面

合刺合勒只惕額列惕親征錄作合蘭只之野元史本紀作
哈闐眞沙陀畏荅兒傳作合刺眞合刺與哈闐對音譯言黑
合勒卽烏拉對音譯言河只惕河旁之謂省文曰只音轉曰
眞六卷失魯格勒只惕本卷溼魯格泐只惕三卷合刺只元
史失達眞其證也額列惕卽客額兒華言曰野曰沙陀然則
合刺合勒只惕額列惕今內蒙古巴林旗境之哈刺木倫河
北岸也

案此合刺合勒只惕及失魯格勒只惕與
哈刺只皆係北岸疑只惕竟是水北之謂水道提綱

曰大遼水卽古潢水東北經巴林部南境有黑河西北自巴林來會黑河蒙古稱喀喇木倫河源出巴林西北境之宋吉納山東南流經察罕城北又東南有二水自西合而來注之又東南流有葛爾達蘇台河西南合三水東流而東北注之又東南有歌爾歌台河自北來會又東南入潢攷遼史地理志慶州本太保山黑河之地有黑河中京正北度潢水五十里度黑水七十里至祖州又九十里至臨潢府卽此黑河也哈喇木倫河北爲養因温都兒山東南祕史云卯温都山陰合刺合勒只惕額列惕者下文赤吉歹等一則曰山前忽刺安不刺合惕地面孛羅忽勒再則曰山前忽刺安不兒合地面以西北之賀爾洪河爲山前則東南之哈喇木倫河爲山

陰矣據成吉思於哈刺合勒只惕額列惕與王罕戰勝乃逆
活泐灰溼魯格泐只惕入捏木兒格思地面又順合泐合河
至捕魚兒海子則合刺合勒只惕額列惕地面在鄂爾虎色
野爾濟河之南而必非其北之合泐合河明矣

忽刺安不刺合惕

忽刺安不刺合惕今烏珠穆秦右翼旗界之賀魯渾河也忽
刺安卽賀爾渾對音不刺合卽布拉克對音賀魯渾河源出
烏珠穆秦右翼旗東南百五十里沙地西北流經賽因温都
爾山東麓又北折而西北經賽音温都爾山北曲曲流三百
餘里涸賀魯渾又作賀爾洪一統志言賀爾洪河西北入蘆
爾虎河不相通豈志據祕史云山前則其下游地蓋自此望
發水時流盛或合并乎

彼此爲內彼爲外山前猶山外也施元杰據親征錄作忽刺河卜魯哈二山又謂河字是阿之譌忽刺安卽忽刺阿今喀拉坎山不刺合卽卜魯哈今巴爾達穆山一在希拉温都爾山東一在東南故曰卯温都兒山前不知山前云者非定是山陽是時王罕之軍自西北來成吉思在賽因温都爾山東南於內爲後於外爲前則山前者乃山之西北也且親征錄明言忽刺河卜魯哈二山蓋賀爾渾河間有卜魯哈山沙漠中孤阜耳必竄改河字爲阿字以就已說何也

土綿土別干姓的阿赤黑失侖幹蠻董合亦惕勇士豁里

前文卷五秃別干董合潰散的百姓來降卽此土別干董合而此云土綿土別干幹蠻董合攷後卷十二萬幹亦刺萬乞

元吉思元槩本作禿綿幹亦刺禿綿乞兒吉思禿綿卽土綿是亦種名蓋土別干姓土綿種董合姓幹蠻種矣又案阿赤黑失俞是土別干姓人名豁里當是董合姓人名元史本紀字作火力以屬下失列門句誤

主兒扯歹伯父

元史朮赤台傳曰兀魯兀台之孫曰朮赤台據此是傳所云孫謂六世孫也

失列門太子領一千護衛軍衝將來

據此知上文勇士豁里四字屬上幹蠻董合惕

成吉思椎胸告天說罷

案罷云者猶時下人語也罷了幸之之辭

咱達達多半百姓在咱這裏

案達達多半百姓在咱這裏指札木合阿勒壇等

合勒合河

水道提綱曰喀爾喀河有數源最東者出阿魯他拉奇嶺之西麓有池廣數十里西南流出百餘里而南源合三水西北流來會又西分爲二支一南流有阿母巴哈爾渾河合三水自南來會又西流與北一支復合又西流有衣藍塞漠河頗大色禽自北大山西南流二百餘里來會又有一河自西北合三源亦南注之又西南受南來之哈爾渾河又西有噶兒查布魯克圖河自東南合噶兒圖思太河及噶兒巴哈尼河二水北流來會又西有活爾活河自南來會折西北流經客

勒河朔地之北其北岸有小山又西北百餘里受東北來之呼魯思太河又西北二百餘里折而西流百里許曰喀爾喀河折西南流數十里西南匯爲巨澤曰布伊爾湖喀爾喀卽合泐合對音

合兒合水的幹峒訥峒山

幹峒訥峒山親征錄作幹兒努兀遣忒哥山岡案輿圖呼哈烏爾山在喀爾喀河南百里許噶兒圖思大河出焉而臨河一山曰吉忒圖當噶兒查布魯克圖河流合喀爾喀河處蓋亦呼哈烏爾一幹縣亘而北者幹峒訥峒卽呼哈烏爾對音遣忒哥卽吉忒圖對音忽亦忒兒葬瀕河之吉忒圖山本呼哈烏爾一幹故祕史曰幹峒訥峒山而親征錄曰幹兒努兀

遣忒哥山岡

帖兒格等翁吉刺

帖兒格元史本紀作弱兒斤

姻親

案姻親專主孛兒帖言訶額侖乃幹勒忽訥氏

勺兒合勒崑山的忽刺阿訥峽的山

勺兒合勒崑山卽今土拉河南岸之巴顏朱拉克山忽刺阿訥峽的山卽今朱拉克山西之汗山案此卽追述前文卷六王罕於土峽刺黑林行會成吉思結做父子之事是二山必在土拉河南岸水道提綱曰土拉河經興安嶺西折而西流經厄圖克山南麓其南岸卽昭莫多地在興安嶺西百里河

岸平地西曰巴顏朱拉克山土拉河又西經汗山東北麓在昭莫多西三十里是勺兒合勒崑卽朱拉克對音忽刺阿卽汗對音無疑原注謂勺兒合勒崑卽和林山忽刺卽土兀刺對音銓案謂土兀刺河邊山遂稱忽刺訥叭已屬支離據輟耕錄和林山二水一卽虎忽刺之文遂俛土拉爲和林尤謬虎忽刺乃鄂爾昆河上源姑洛河對音耳施元杰仍勺兒合勒崑山卽和林山之說而云在鄂爾坤河則去土拉河昭莫多地遠甚

瞎沙馬

西北域記曰狐毛黃而長者曰草狐短而黠者曰沙狐黠音天黃白色沙馬蓋毛色黃白者

樺皮桶

樺胡化切音華古通作華莊子讓王篇原憲華冠縱履注以華皮爲冠司馬相如上林賦華楓杵欂師古注華卽今華皮貼弓者柳邊紀畧曰樺皮樺木皮也樺木偏山皆是類白楊春夏間剝其皮入污泥中謂之槽槽數日出而曝之地白而成花形者爲貴金史所謂醬辦也黑龍江外紀曰山谷多樺木土人以爲箭筈爲鞍版爲刀柄皮以貼弓爲車蓋爲穹廬爲札哈小船也縫之如栲栳大擔水小盛米麪謂之樺皮斗俄羅斯亦有之極小雕鏤精巧宜儲檳榔鼻煙號老羌斗

巴兒壇

巴兒壇蓋巴兒合之傳寫譌也卽幹勤巴兒合黑卷四不里

李可與巴兒合勇猛的子孫行作伴是幹勤巴兒合黑亦可稱巴兒合矣合字與台字形似傳寫作壇耳

三河源頭

今肯特山祕史之不兒罕山也幹難河出其東北麓克魯倫河出其東南麓土拉河出其西麓故曰三河源頭巴塔赤罕始生於此元史本紀曰三河祖宗肇基之地黑林烏謂三河源頭者

只說脫黑脫阿師翁

案云他幾曾說皇帝父親來只說好殺人的老子者他謂太祖也言太祖何嘗真以父視王罕只說王罕乃好殺之羣人耳云我行也幾曾說是安荅來只說脫黑脫阿師翁繞着羊

回羊尾子行者我行桑昆自謂也言我等亦何嘗肯受太祖之詐真認爲一箇性命般之安荅早說太祖固與脫黑脫阿一脈師承其有已無人猶奪羊乳者之忍心害理也

你必勒格別乞脫朵延兩個將旄纛立起驢馬每放得肥着

必勒格疑卽別勒古台對音脫朵延與葛不律幼子同名而非一人旄纛立起驢馬放肥言但勉爲戰備勿用多言元史本紀所云今日之事有戰而已也

成吉思隨卽起去至巴勒渚納海子行

嘗怪元太祖與王罕相持於班朱尼河有飲水誓眾一事見於元史紀傳者不一而足而祕史之敘成吉思至巴勒渚納海不載其說又怪飲水誓眾果在還軍董哥澤之後則時已

戰勝何以從行僅十九人甚至餓糧俱盡反復尋究始悟元史所云飲班朱尼河水乃是聞變潛遁之初祕史所云至巴勒渚納海則是既戰還軍之後實兩時而非一事也攷太祖取克列部始末祕史曲折具悉獨漏敘誓眾一節耳蓋當巴歹乞失里以謀來告卽夕太祖棄輜重東走事起倉猝從行僅十九人至班朱尼河餓糧且盡射野馬以食於是有飲水之誓又東南行至賽因温都山則祕史所云卯温都兒元史所云阿闐塞也旣而王罕軍至遂與戰於黑河之北則祕史所云合刺合勒只惕額列惕元史所云哈闐眞沙陀也戰旣勝乃北收兵逆烏爾虎河至索岳爾濟山又北至喀爾喀河貝爾池降宏吉刺別部遂西還克魯倫河至桑沽兒河舊營

祕史所云統格黎小河東邊元史所云董哥澤也於是遣使致責王罕復移軍而東則祕史所云隨即起去至巴勒渚納海子者也推其始躲於卯溫都兒山也非特避其朝銳亦將誘之遠鬪以屈之也既勝而急從之直至統格黎河所以作我之士氣也遣使致責所以懈彼之眾志也既而復移軍東所謂亟肄以疲之多方以誤之也則又偽哈撒兒之言所以驕敵並以覘敵也還報知王罕深信不疑置酒高會於是銜枚疾進出其不意所謂守如處女捷如脫兎一舉而克列氏墟矣自修史者不明地理不識兵機南北東西瞽人漆室前後進退顛錯支離讀者惑焉原注疑班朱尼河當有戰事不知戰事乃在哈闌真蒙古源流所云鄂諾河下游呼倫貝爾

地方所包者遠正指合刺合勒只惕耳

汪古惕種

元史阿剌兀思剔吉忽里傳汪古部系出沙陀遠祖卜國世爲部長金源氏塹山爲界以限南北阿剌兀思剔吉以一軍守其衝要姚燧河內李氏先德碑曰郇王世居靜安黑水之陽攻黑水卽古白渠荒干水亦曰金河今名喀喇烏蘇源出山西大同府北殺虎口外鑲藍旗察哈爾東北七十里海拉蘇合坡西流合察罕烏蘇經歸化城南又西入於河元至元中於其地建黑水新城成宗置靜安路方觀承從軍日記曰張家口外三百里有城基周十餘里近北廢堵有碑載元皇慶中加上孔子大成封號檄下諸路勒石廟學字完好可讀

蓋元靜安路集慶縣地而廢堵則縣學宮址也銓案汪古部
蓋今察哈爾及四子部落之地馬祖常撰月合乃神道碑云
雍古部族居靜州之天山天山古居延海此非河西之居延
海靜州一作淨州元史地理志淨州路領天山一縣一統志
曰廢淨州在今四子部落西北與喀爾喀接界處

阿刺忽失的吉惕忽里

案元史本傳作阿刺兀思剔吉忽里太祖本紀但稱阿刺忽
思蓋忽里官名吉惕是忽里之號阿刺忽失則其人名也

羯羊

案說文羯殺犗也本草羊去勢曰羯則羯羊去勢之羊也張
燧曰西域有獸曰羯尾大於身之半白湛淵曰羯尾大如斗

則羯者大尾羊也今一種羊卷毛扇尾俗曰胡羊

貂鼠

案今黑龍江甯古塔索倫等處皆產貂甯古塔紀畧曰塔城

東北八九百里爲呼兒哈

一作呼爾哈卽居呼爾哈松花江兩岸之挈耶勒革依克勒帖什哈

喀喇

又六百里爲黑斤

一作黑金又作赫哲又作赫真有不剃髮兩喀喇皆號赫斤又

六百里爲非牙哈

一作飛牙喀總名烏稽一乘曰窩集者蓋大

山老林之名滿洲源流攷曰兩漢晉魏時國於東方者爲夫餘挹婁三韓其邑落散處山海間者又有沃沮濊等名以史傳核之沃沮者實卽今之窩集也秋濤萊欽定開國方畧天命天聰年間屢征東海遼集部遼集卽窩集蓋其人散居窩集之中卽以爲部落名也至古以此名國尙不止沃沮一國如元魏之勿吉國隋唐之靺鞨國唐之拂涅部遼之屋惹國皆卽窩集二字譯寫各異其以老林爲窩集而因以名國則數千年未有改也又名魚皮因其衣魚皮故名其地不產五穀出魚及貂皮元狐黃狐黃鼠灰鼠水

獺每歲五月閒此三處人乘查哈船

查哈一作札哈小船也黑龍江外紀曰札哈較

威呼尤輕捷裁受兩三人相傳墨爾根察邊猝遇江漲協領

那里勒泰以馬革爲札哈徑渡其後以樺皮爲之猶那遺法

江行至甯古塔南關外進貂將軍設宴并出戶部頒賜進貂

人袍帽鞞襪挺帶汗巾扇子等物各一捆賜之每人名下擇

貂皮一張進上餘聽貿易黑斤所產貂皮爲第一非牙哈畧

次呼兒哈爲次三處俱無官長人愚而信義有與店家賒綢

緞蟒服者店主擇黑貂一張爲樣約來年照樣還若干至次

年必照樣還清有他故亦必託人寄到柳邊紀畧曰自甯古

塔東北行四百餘里住虎爾哈河松花江兩岸者曰孛耶勒

或作諾雷曰革依克勒或作克宜克勒曰祐什喀里或作祐

或作關雷習喀禮

自甯古塔東行千餘里住烏蘇里江兩岸者曰穆連

連

或作穆稜或作木倫或作木輪

又二百餘里住伊喇河源者

一作尼滿

曰欺牙

喀喇

或作奇雅喀喇何秋濟曰喀喇漢言姓也

自甯古塔東北千五百里住松花

黑龍江兩岸者曰薙髮黑金喀喇凡六以上地皆產貂每年

入貢又東北行四五百里住烏蘇里松花黑龍三江匯流左

右者曰不薙髮黑金喀喇十數

一日額登喀喇

所謂使犬國也又東

北行七八百里曰飛牙喀自甯古塔東北行三千里曰欺勒

爾

或作奇勒爾

濱大東海以上各種產貂皆三年一貢貂鼠喜食

松子大抵一松林中或土窟或樹孔捕者以網布穴口而煙

熏之貂出避輒入網中又有縱犬守穴口伺其出而嚙之者

紫黑色毛平而理密者爲上紫黑而理密者次之紫黑而疏

與毛平而黃者又次之白斯下矣康熙初易一鐵鍋必隨鍋

大小布貂於內滿乃已今且以一貂易兩鍋矣易一馬必出數十貂今不過十貂而已馬良者乃十四五亦不以上貂易也上貂皆產魚皮國歲至甯古塔交易者二萬餘而貢貂不與焉甯古塔人得之七八月間售販鬻京師者歲以爲常京師往往賤挹婁而貴索倫蓋索倫毛深而皮大也然不若挹婁之耐久龍沙紀畧曰索倫本名索莪羅地產貂以捕貂爲役分八圍出爾罕者兵車之會地在卜魁城北十餘里定制於草青時各蒙古部落及虞人胥來通市商賈移肆以往艾渾墨爾根屠沽亦皆載道輸贖絡繹皮幣山積牛馬蔽野集初立劃沙爲界各部落駐其北商賈官卒遊人駐其南中設兵禁將軍選貢貂後始聽交通凡二十餘日貂產索倫東北

捕貂以犬人歲輸一於官各私識毛色策佐領處五月將軍
至墟場選以貢凡三等官給價有差不入等者聽鬻東北諸
部未隸版圖以前無金甌罌甌之屬商賈初通時以貂易金
實金令滿一金常數十貂後漸以貂蒙金口易之三十年前
猶貂圍金三匝一金輒七八貂今則一貂值數金矣黑龍江
外紀曰布特哈譯言虞獵故有打牲處之稱其地起齊齊哈
爾墨爾根境內東北直達黑龍江城總管駐伊倭齊地在齊
齊哈爾北三百四十里何秋濤曰布特哈初設索倫達呼爾
總管二員副總管八員謂之打牲頭
員蓋布特哈爲打牲部落之後陸續增設滿洲總管一員副八
業採捕者悉隸之總管駐劄處每歲五月布特哈官兵悉來
在伊伯河西岸地名札克丹
齊齊哈爾納貂皮互市號楚勒罕譯言盟會也初在城西北

四十里因沁屯本名克伊勒屯乾隆六十年以事改城中而其部人卓帳城北故俗有北關集之稱交納貂皮楚勒罕第一事也選入格者充貢餘聽布特哈自售謂之瑪克塔哈色譯言擲還之貂也選貂之制將軍副都統坐堂上協領與布特哈總管分東西席地坐中陳貂皮詳視而去取之甲乙既定鈐小印於皮背封貯備進然後印擲還之皮而皆別其爪如皮背無印而四爪全者私貨也人不敢買貢貂有一等二等好三等尋常三等之分嘉慶十五年選定一等四十二張二等一百四十張好三等二百八十張尋常三等四千九百四十三張歲大畧如是而列一等者皆雅發罕俄倫春及畢喇爾物布特哈無間官兵散戶身足五尺者歲納貂皮一

張定制也

卜魁紀畧曰布特哈華言虞獵也其人世以獵貂爲事戶出一丁以竿量身足五尺者歲納一貂貂

皮上各書

如甲皮不入選多選乙一張甲出銀三兩償乙事

皆主於總管故每歲俸餉皆選貂後支放乘除損益之布特

哈交納貂皮先已自定等第尋常三等之外皆以紬籤標記

紅籤者索倫達呼爾物綠籤者摩凌阿俄倫春物黃籤者雅

發罕俄倫春及畢喇爾物也

何秋濤曰黑龍江不盡索倫也

巴爾呼有鄂勒特則歸自蒙古有滿洲有漢軍則從自吉林有

爾則其同鄉而別爲部落者世於黑龍江人不問部族概以

索倫而其入亦居之

不疑說者謂索倫駝勇聞天下故人皆

樂藉其名以自壯索倫族類至須有駝喇爾都喇爾布喇穆等

姓多居布特哈呼倫貝爾境而齊齊哈爾等三城較少亦有

一流寓俄羅斯者其國謂之喀穆尼漢又謂之通古斯達呼爾

一作達喇哩一作打虎兒或作打狐狸著姓有克因精奇里

瓦爾果布勒等氏多占籍齊齊哈爾等三城及布特哈而呼

倫貝爾則不過數家俄倫春者索倫達呼爾類也黑龍江以

北精奇里江源以南皆其射獵之地其眾夾精奇里江以居

亦有姓都刺爾者似與索倫爲近其隸布特哈入旗爲官兵者謂之摩凌阿俄倫春其散處山野僅以納紹爲役者謂之雅發罕俄倫春雅發罕俄倫春有布特哈官五員分治三歲一易號曰諸達歲以徵紹至其地其人先期畢來奉命唯謹過此則深居不可蹤跡矣畢喇爾亦然有驍騎校四員楚勒分治之其人有姓默訥赫爾者有姓都訥亨者其著族罕時城西北穹廬蔽野男女雜遯布特哈之所屯也稍東爲買賣街列肆陳貨皆席棚牛馬市於日中羊羣散於原野有來自呼倫貝爾者有來自蒙古者通謂之營子說者謂在因沁屯時營子之多十倍今日布特哈男婦車馬之盛視今日亦殊過之故其時集稱殷富官稅亦賴以充布特哈屯聚微有部曲其穹廬皆東向總管治事所編柳條爲垣餘皆環列輻輳車人畜雜處其間

青鼠

黑龍江外紀曰灰鼠長尾時掉置背上自覆其首投以榛子雙爪抱嚙如猴然出諾敏河者佳號索倫灰鼠

也古也松格禿忽

元史宗室世系表也苦卽也古移相哥卽也松格脫忽卽禿忽太祖本紀曰哈撒兒別居哈刺渾山妻子爲王罕所擄挾幼子脫虎走脫虎卽此禿忽與此言三子並撒在王罕處異阿兒含勒苟吉地面

施元杰曰今車臣汗中末旗之西北境右翼中右旗之東南界克魯倫河西南岸之額爾克納克山也

金撒帳

元史輿服志曰廬帳除龍虎文三品至五品許用金花刺繡

坐

禮曲禮坐而遷之疏坐亦跪也

與忽亦勒答兒的妻子

原注以其忠誠衛上使忽亦勒答兒家得其死力而元史畏答兒傳曰只里吉實抗畏答兒乃分只里吉民百戶隸其子銓案刺忽亦勒答兒下馬者初非只兒斤且太祖方嘉合答黑可以做伴則其所以與忽亦答兒家者李說爲長元史云云淺矣

元祕史李注補正卷八

秀水高寶銓

太祖處有恩的上頭

原注往王罕處告卽位有功銓案一使之勞似不足言恩
莎兒合黑塔泥

元史后妃表睿宗唆魯忽帖尼妃亦怯列氏至元二年追上
尊諡曰莊聖皇后憲宗紀母莊聖皇后諱唆魯禾帖尼皆卽
莎兒合黑塔泥對音

爲那般將札合敢不的百姓不曾教虞了

案後文卷十成吉思對主兒扯歹說初乃蠻篋兒乞潰散時
札合敢不獻了兩箇女子將他百姓全了後又反去你用計

將他拏住方虜了他百姓蓋札合敢不實降而復叛者此卷
納女云云卽前文卷五成吉思在帖兒速地面客列札合敢
不來降及元史本紀克列部札阿紺孛來歸之事在王罕已
滅塔陽方擒之際卷十又反去用計拏住云云卽元史朮赤
台傳俘札哈堅普之事在降而復叛之後

教自在快活

案此所謂自在荅刺罕也

阿不只阿闊迭格兒

阿不只阿闊迭格兒後文又作阿卜只合闊帖兒格今克魯
倫河南車臣汗部中末旗境之庫特肯額里雅山也案闊迭
格卽後文卷十四之闊迭兀卷十五之闊迭額元史太宗紀

之曲雕阿闌庫鐵烏阿刺里銳鐵鐸胡闌山定宗紀之曲律
淮黑哈速憲宗紀之闊帖兀阿蘭明宗紀之闊朵傑阿刺倫
攷祕史卷十五終云此書大聚會著鼠兒年於客魯漣河闊
迭額阿刺勒地面寫畢元槩本作闊迭額阿刺倫朵羅安孛
勒荅合失勒斤扯之間幹兒朵思云云則闊迭格必與朵羅
安相接又元史明宗紀丁未次哈里溫戊申次闊朵傑阿刺
倫云云則闊迭格又必與哈里溫相近朵羅安今拖拉哈山
哈里溫今巴顏烏喇山與相接近則知卽今庫特肯額里雅
山矣蒙古遊牧記云格根車臣汗旗牧地西南至庫特肯額
里雅山接中末旗界中末旗牧地北至庫特肯額里雅山接
汗旗及右翼中前旗界右翼中前旗牧地當喀魯倫河曲處

南至庫得根額里雅接中末旗界北至巴顏烏蘭山是也幹
兒朵思譯言行宮太祖紀曰十一年丙子春還臚胸河行宮
雪不台傳曰太祖初建興都於班朱尼河蓋未都和林以前
此實建庭之地故自太宗憲宗凡卽皇帝位朝會諸王百官
各大典每於斯舉行焉後文卷十四成吉思崩後諸王駙馬
并萬戶千戶等於客魯漣河闊迭兀阿刺勒地行大聚會著
依成吉思遺命立斡歌歹做皇帝元史太宗紀元年己丑秋
八月諸王百官大會於怯綠連河曲雕阿闐之地以大祖遺
命卽位於庫鐵烏阿刺里親征錄己丑八月諸王駙馬百官
大會於怯綠連河曲雕阿闐共冊太宗登極憲宗紀元年辛
亥諸王等大會於闊帖兀阿闐之地共推帝卽皇帝位迨後

遷都和林世祖定鼎於燕而凡由漠北入承大統者泰定之
卽位龍居河明宗之次闊朶傑阿剌侖遵舊典也凡曰阿剌
勒曰阿剌侖曰阿闐曰阿剌里曰胡蘭曰阿剌倫皆卽額里
雅之對音譯言山其曰闊迭格兒曰闊帖兒格曰闊迭兀曰
闊迭額曰曲雕曰庫鐵烏曰銳鐵鐸曰曲律淮黑曰闊帖兀
曰闊朶傑皆卽庫特肯之對音阿不只阿卽雪不只對音亦
卽失勒斤扯對音也原注於此闊迭格兒闊迭兒格與後文
闊迭兀闊迭額仍爲兩地非蒙古遊牧記於元史怯綠連河
曲雕阿闐之文讀怯綠連河曲爲句雕阿闐爲句謂是巴顏
烏喇山尤非曲字讀若曲出律之曲作庫聲非河曲之曲也
的的克撒合勒地面

的的克撒合勒地面今推河南境格格特站之地案云桑昆
不曾入去以此就往川勒地面蓋其地已近瀚海今格格特
站在推河所豬鄂洛克泊南其南卽大漠格格特卽的的克
撒對音也原注謂卽元史揭揭察合澤施元杰申其說謂今
察罕池銓案察罕池在鄂勒昆河西果如其說王罕望西而
道祕史當云走至捏坤水行入去的的克撒合勒飲水今其
文不然非也

捏坤水

水道提綱曰推河源出杭愛山尾南麓西南流會南來小水
二折南流會東來一水又西南有烏可克河西北自烏可克
嶺合三水東南流來會又南有雅馬圖河自東北合三水西

流來會卽鄂爾吉圖都蘭喀喇山西水也又南有庫色冷圖
河自西來會稍南有一水自東合二澗來會又西南流百里
許有喀喇虎濟爾河自西北來會又南經兩山間有額勒敦
圖河自東合三水來會又南出山曲曲流平地中百八十里
經博濟和朔驛東又南折西南流百餘里西瀦爲鄂洛克鄂
模形東西長四十里西十五度五分極四十五度六分銓案
鄂洛克鄂模亦曰鄂羅克泊卽捏坤之對音在格格特站之
西北百餘里

川勒地面

案後文卷十五韓歌歹說川勒地面先因無水止有野獸無
人住今可去踏驗中做營盤的地方教穿井者云云則川勒

蓋卽沙磧張穆蒙古遊牧記引耶律鑄雙溪醉飲集涿邪山
詩注曰南鄰處月之郊和林城唐碑文也未曉處月之言有
問及余者因爲之說云處月之言磧鹵地也班固燕然山銘
經磧鹵絕大漠踰涿邪涿邪山者其山在涿邪中也涿邪後
聲轉爲朱邪又聲轉爲處月唐史沙陀處月種也莊宗紀其
先本號朱邪後自號沙陀而以朱邪爲姓者是也處月部居
金婆山之陽蒲類海之東皆沙漠磧鹵地也西漢書注薛瓚
曰沙土曰膜其說得之卽今華夏猶呼沙漠爲沙陀突厥諸
部遺俗至今亦呼其磧鹵爲朱邪聲轉爲處月今又語訛聲
轉爲川闕皆從鞞鞞及所書之人鄉音輕重緩急而致銓案
據此則川勒又卽川闕聲轉矣元史言亦合刺走西夏則此

川勒地而今翁金河以南河套以北之瀚海也

伴當闊闊出

銓案闊闊出妻說在前好衣服好茶飯曾與你喫穿云云是闊闊出之於桑昆必非外臣新進又太祖說這等人如何做伴但薄其棄桑昆不言其曾由麾下叛去後十卷太祖對孛羅兀勒云云亦不言闊闊出有叛去之事此闊闊出與四養子之闊闊出必非一人

野馬

唐書堅昆其獸有野馬骨咄黃羊西域聞見錄曰野馬駝騾邊外皆有深山戈壁之中往往成羣塞北紀程曰野騾蒙古謂之七刻貪色黃頗稱駿性善奔逸射得之重可數百斤

蠅蟲

黑龍江外紀曰其蠅豸傷人畜者馬蜂土蜂外蚊虻最毒蚊絕大飛如雨虻俗呼瞎虻齧牛馬銳入肉須臾白者變紅銓案蠅蟲蓋卽虻今俗呼虻曰虻蠅

衣服黑暗

宋黃震古今紀要逸編曰生鞮鞞有二曰黑曰白蒙鞮備錄曰鞮鞞種有三曰黑曰白曰生今成吉思皇帝及將相大臣皆黑鞮鞞也

帖篋延客額兒

帖篋延客額兒卽元史特薛禪傳之迭蔑可兒今蒙古克西克騰西北達兒泊之地也帖篋延客額兒元史本紀作帖麥

垓川皆卽迭蔑可兒對音而特辭禪傳曰歲甲戌太祖在迭蔑可兒太祖本紀曰九年甲戌夏六月避暑魚兒濼知迭蔑可兒卽魚兒濼之地魚兒濼特辭禪傳稱蒼兒海子卽今達兒泊也水道提綱曰達兒鄂模在克西克騰部西北一百七十里沙磧中其西及南皆大沙磧蓋四際廣莫故曰客額兒曰川矣原注山名水名皆非

客勒帖該合蒼

元史本紀作建忒該山今喀爾喀河南岸之吉忒圖山也
設六等扯兒必官

六等或是飲膳服御文史車馬廬帳府庫等六項職事耳原注云云案元行漕運在於至元而後太祖時安有所謂鎮遏

軍者非也

鼠兒年

甲子歲

康合兒合山

此今轟郭爾山也康合兒合卽轟郭爾之對音山在今土謝圖汗部左翼右末旗境其東北接車臣汗右翼中旗界卽撒阿里地面也原注以爲杭愛山則是蒙古已溯塔米爾河而上施元杰以爲杭亦哈馬勒山則是蒙古亦已臨鄂勒昆河而營何以又有塔陽罕順塔米爾河渡幹兒豁水之文乎且與撒阿里皆遠不相接非也

康孩

沆海山屢見於元史卽今杭愛山亦卽古都斤山都尉韃山
鬱督軍山烏德韃山和林山在元和林城西今喀爾喀賽音
諾顏部西界自鄂勒昆河源處蜿蜒北折塔米爾色楞格諸
水之源皆出其東麓綿亘一千餘里元時和林西面之藩蔽
也一統志以在鄂勒昆河北直甯夏北二千里翁金北五百
餘里者爲主山而北折繞色楞格河上流諸水發源之處抵
於俄羅斯界水道提綱則以色楞格河南源齊老圖河所出
爲山頂而鄂勒昆河所出爲山尾要之山在和林之西爲鄂
勒昆色楞格諸水所發源則一也近人或指鄂勒昆河東一
山以當之謬也祕史云塔陽在康孩地面合池兒水邊遂順
塔米兒河渡幹兒豁水則杭愛山不在鄂勒昆河東明甚試

更以元史武宗撫軍北邊事證之武宗紀曰大德四年八月
與海都戰於闊別列之地敗之十二月軍至案台山五年海
都入犯武宗與戰於迭怯里古又大戰於合刺合塔據姚燧
乞台普濟先德碑言寇出金山南闊別列知闊別列在金山
之南據康里脫脫傳大德五年叛王海都犯邊脫脫從武宗
討之師次航海進擊海都大破其眾知武宗於大德五年破
海都於航海又據乞台普濟碑大德五年寇舉國至又戰於
哈喇台乞台普濟子也兒吉尼以數十騎出入其陣數四所
當披靡寇大駭卻皇上乘之遂大潰哈刺台卽哈刺合塔曰
大至曰舉國至皆舉眾深入之謂深入而敗無一語及和林
則戰地實在和林西矣又據牀兀兒傳大德五年海都兵越

金山而南牀兀兒急引兵敗之又據乞台傳子哈贊赤大德五年從戰杭海從武宗親征哈刺阿荅復從劄兀兒征不別八憐之地哈刺阿荅卽哈刺合塔劄兀兒卽牀兀兒據是傳次第知海都兵敗而西走合刺合塔又戰敗而西走金山南不別八憐也武宗以四年八月戰金山南十二月軍至案台想五年必由案台東歸故海都大舉入犯而戰杭海也然則杭海在合刺合塔之東和林之西矣今齊老圖河塔米爾河鄂勒昆河諸源之山由北而南環繞和林之西實和林西面門戶爲海都東寇必爭之險海都大德五年之寇和林仍未被兵則謂此諸山爲杭海實於地勢合若移於鄂勒昆河東則海都兵尙未至和林不應寇從西來而康里脫脫哈贊赤

諸人反赴戰於東若海都兵已越和林而東則和林要地不
應諸傳概未之見而牀兀兒轉在金山之南準之義事情證
顯然矣既知杭海在元和林西爲今鄂勒昆塔米兒色楞格
諸水所出則知杭海卽古所謂都斤山都尉健山鬱督軍山
烏德鞬山和林山也周書突厥可汗恆處都斤山每歲五月
中旬祭天神於都斤隋書沙鉢畧治都斤山唐書突厥建庭
都斤山音轉爲度斤隋書突利本居北方以尙主故南徙度
斤舊鎮蓋其時沙鉢畧南居白道川故謂都斤爲舊鎮也唐
書突厥亡薛延陀遂建牙於突厥故地都尉健山北獨邏水
南薛延陀因突厥之亡而徙牙知都尉健卽都斤音轉矣唐
貞觀二十年李世勣討薛延陀至鬱督軍山遂滅薛延陀承

徽元年高侃擒突厥車鼻於金山詔處其眾鬱督軍山薛延陀牙都尉健山而世勣至鬱督軍山遂滅薛延陀知鬱督軍卽都尉健音轉矣唐書回紇南居突厥故地徙牙於烏德鞬山昆河之間左右有嘓昆河獨邏水皆屈曲東北流嘓昆在南獨邏在北過回紇牙帳東北五百里而合流又云回紇牙帳西據烏德鞬山南依嘓昆水北六七百里至仙娥河回紇徙牙突厥故地知烏德鞬卽都尉健鬱督軍音轉矣元史巴而木阿而忒的斤傳先世畏兀兒之地有和林山二水出焉曰虎忽刺今監本作禿忽刺攷契氏傳釋耕錄皆作虎忽刺元史蓋寫譌曰薛靈哥畏兀兒卽回紇虎忽刺卽今鄂勒昆河上源姑洛河薛靈哥卽今色楞格河知和林山卽回紇之烏德鞬山矣回紇建牙嘓昆水

北卽今鄂勒昆河獨邏水南卽今塔米爾河北六七百里至仙娥河卽今色楞格河正卽元和林之地而其西據之山爲色楞格姑洛二水所出惟杭愛山當之矣

合池兒水

水道提綱曰哈瑞河出喀爾喀西界西南幹山齊老圖河源之南隔山三百餘里他米勒河源隔山百餘里西十六度三分極四十七度七分山脈西自枯庫嶺東北分枝繞此河諸源之南曲曲千餘里爲巴顏濟魯克山又北爲賽堪山又東北爲納鄰庫勒墨地北之厄勒黑圖山又東稍南爲厄魯墨德衣山峯嶺不斷山西北爲哈瑞河山東南爲鄂爾渾河東北流百里合西南一水又東會西一水又東會南一水折而北會西一水又東北有一水自西北大幹山東流合北來衣孫都蘭喀喇地山南二水而南流來會始曰哈

瑞河又東北曲曲三百里有米薩朗河自西合二水東流來會又東北循呼魯蘇古兒山南又東有呼納衣河自西南山中東北四百里經賽堪山北麓又東北百餘里來會又東北百餘里入色楞格河銓案哈瑞河亦曰哈綏河皆卽合池兒對音源出齊老圖河源之南卽杭愛山頂南行一幹而南隔山百餘里卽他米勒河之源矣

金山

金山卽阿勒坦山阿勒坦蒙古語謂金也金山之名始見後漢永和三年左校尉耿夔大破北單于金微山去朔方塞五千餘里北史阿史那居金山之陽金山形如兜鍪在高昌西北唐書車鼻鼠金山之北其地三垂斗絕惟一面可通騎距

長安萬里是時金山爲乃蠻建庭之地塔陽罕欲越過金山誘引著他正兵法所謂以逸待勞以主待客者果用其策勝負未可知也惜乎古出魯克諸人不悟耳

達達每多從何處來多半與札木合在這裏有

言塔陽信哨望人說達達每多抑思多從何來夫達達人其大半隨札木合降附在此也案時從札木合者如泰赤兀哈答斤撒只兀等部也

可惜可克辭兀撒卜刺黑老子

案老子疑是老了之譌後文卷十二早老了注云老者卒也是也言可惜可克辭兀撒卜刺黑今已老死無人能治軍馬也

於馬上打著箭筒另去了

案師出以律否藏凶晉所以敗於泌也豁兒速別赤附和古
出魯克激塔陽接戰遂以致敗祕史歷敘塔陽一子一臣正
以見乃蠻敗亡之由耳

塔米兒河

塔米兒河元史作塔密爾河歐陽元高昌俟氏家傳作達彌

爾河今日塔米爾河又曰他米勒河源出喀爾喀三音諾顏

中左末旗東南庫庫嶺東麓會典圖說塔米爾河出三音諾顏中左末旗東南山水道提綱

他米勒河有南北兩源北源出枯東流南北合數水提綱曰

庫嶺東麓在杭愛山西北三百里北流而合又北會南來一水又東北而三澗自西北合而東

流來會又東北會西北來一水又東會南來一水又東北會
西北一水始曰他米勒河北經中右翼末旗北又東百數十

岸連山即哈瑞河諸源也

里經哈龍恩格勒山北

提綱曰又東受北一水又有河西南自哈龍恩格勒山東北流合二水來會

又東百里瀦為白魯勒倭黑池

提綱曰池廣數十里中有一山又東經布拉

干山北

提綱曰又東有察罕烏林河自西北來會其南岸即布拉干北山今案會典圖說無自西北來之察罕烏

林河今輿圖塔米爾河經布拉

干山北其北岸亦無水來入也又東百餘里有察罕鄂倫河

自東南山西北流來會

提綱曰他米勒河之西者曰阿素郭特麓在鄂勒昆河之西者曰阿素郭特

河西北流百里許又在西五十里者兩澗北流而合又在

其西南九十里者三澗合而東北流有西北來二水皆會又

東北始曰他米勒河又北而會阿索郭特河皆杭愛以北水

也又北東會東南來一水其東即蘇巴拉干山又北經特禮

布拉克地東受西北來一小水又東北受西北來之朝穆多

河又東北經布拉克地南受西北來一小水又東北折而北流

里克河自南來會又東北受西北來一小水又東北折而北流

有一河合四水自西來會又東北受西北來一小水又東北折而北流

會典圖說謂之察罕鄂倫河據歐陽元高昌契氏傳云和林

有三水一經城西北流曰和林河以地望求之正是此水則

鄂倫即和林之對音提綱以為他米勒河南源殊誤惟元史

和林河以哈刺稱會典圖說鄂倫河以察罕名為黑為白義

適相反所 又東經額魯特前旗南百里又東入土謝圖汗部
未詳也 境合於鄂勒昆河案僕氏傳曰和林有三水焉一並城南東
北流曰幹爾汗河一發源西北東流曰忽爾班達彌爾河一
經城西北流曰和林河達彌爾卽塔米兒對音蓋元之和林
在此河之南矣唐書回紇傳曰回紇建牙烏德鞬山噀昆水
北獨邏水在北東北流而合獨邏亦卽塔米兒對音也

納忽山厓

蒙古遊牧記曰土謝圖汗旗牧地西南至諾昆陀羅海接右
翼右旗界右翼右旗牧地南至諾昆陀羅海接軍臺及左翼
後旗界銓案諾昆卽納忽對音納忽山厓卽諾昆陀羅海矣
山在翁金河之北額爾得尼招之東南蓋卽杭亦哈馬勒山

之東南幹也

察乞兒馬兀惕地面

蒙古遊牧記曰土謝圖汗左翼左中末旗牧地當喀魯喀河源西南至達爾瑪接土謝圖旗界銓案達爾瑪卽察乞兒馬對音其西接土謝圖汗旗界卽諾昆陀羅海故曰納忽山崖東邊也蓋蒙古自撒阿里進兵循翁金河而西塔陽順塔米爾迎敵渡噶昆河而東達爾瑪地左山右川平原中拓正是戰地矣

其子古出魯克

案古出魯克激父憤鬥以至於敗又以父與敵率先潰遁參之內其足食乎

襲至阿勒坦山前

案此乃追襲古出魯克而直搗其庭也塔陽已於納忽山孛住矣西遊記云金山前白骨甸乃滿大勢敗於是蓋指明年額兒的失一役溺死過半餘皆散亡耳

合刺荅勒忽札兀刺地面

合刺荅勒忽札兀刺地面今克魯倫河西岸肯特山西南幹噶老台嶺東麓胡布拉克之間也水道提綱曰克魯倫河西南流經肯忒山頂之南又西南至布塞山東南麓又西南至噶鄂泰嶺之東山脈北自肯忒山忒勒兒几嶺懸亘而南其東水皆入克魯倫河其西水皆入土拉河克魯倫河又西南二百餘里至兩山間西岸山卽噶鄂泰嶺又南折而西爲

敗拉薩山又西南爲興安嶺南臨大漠自興安嶺東過平地爲呼商阿山北有呼查不拉河又東過平地爲此山縣亘二百餘里今案噶鄂泰嶺爲肯特山西南幹山一曰噶老台嶺卽合刺荅勒之對音呼查不拉河源出噶老台嶺東南麓東南流注於克魯倫河一曰胡札布拉克卽忽札兀刺之對音其地在克魯倫河土拉河兩間西北踰肯特山卽篋兒乞故居東南爲克魯倫河西南岸卽撒阿里地面蓋脫黑脫阿先被王罕趕入巴兒忽眞脫窟木地面迨王罕敗亡復南據舊地此時元太祖方西追乃蠻古出魯克東方諸部勢必空虛故脫黑脫阿以乘虛搗穴之謀爲圍魏救韓之舉太祖得札合敢不之報還師趣援篋兒乞之眾方自北越肯特山而南

蒙古之師已自西渡土拉河而東適於此間相遇也脫黑脫阿於合刺荅勒忽札兀刺地面戰敗乃由撒阿里客額兒地面走而西與乃蠻古出魯克相合于額兒的失不黑都兒麻地面則合刺荅勒忽札兀刺必在額兒的失水以東近撒阿里之地原注喀喇塔拉額西柯淖爾據西域水道記在安阜城北一百三十里直宰桑泊之正南是在額爾齊斯河西東北距撒阿里千餘里非矣

追至撒阿里客額兒地面

撒阿里客額兒乃噶鄂泰嶺以南地脫黑脫阿傍色楞格河以居戰敗自應北遁其反走而南者蓋元太祖自阿勒坦還師以救根本必循土拉河指不而罕合勒敦而來脫黑脫阿

既南出至嚙鄂泰嶺之間一戰而敗其歸路已爲太祖所截也案前文五卷成吉思與札合敢不將篋兒乞戰退卽此役矣